

ԳՐԱՆՈՍՈՒԹՅՈՒՆ ԵՎ ՔՆՆՈՒԹՅՈՒՆ

Հ. ԺԱՄԿՈՉՅԱՆ, «ՀԱՅԱՍՏԱՆԸ ՆԱԽԱԳԱՐՅԱՆ-ՀԱՄԱՅՆԱԿԱՆ ՀԱՍԱՐԱԿՈՒԹՅԱՆ ԵՎ ՍՏՂԻ-
ԿԱՏԻՐՈՒԹՅԱՆ ՇՐՋԱՆՈՒՄ», պրակ 1 (Հայ ժողովրդի պատմություն 12 պրակով, Ոստմնական
ձեռնարկ Հայկական ՍՍՌ բուհերի համար), Երևանի համալսարանի հրատարակչություն, Երևան,
1961:

Սովետական պատմագիտության բուռն վերելքը, հնագիտական նոր հայտնադործումները
անհրաժեշտ պայմաններ են ստեղծել հայ ժողովրդի պատմության համալսարանական, ամբող-
ջական, գիտականորեն հիմնավորված դասընթաց կազմելու համար: Այդ գործին է ձեռնամուխ
եղել Երևանի համալսարանի հայ ժողովրդի պատմության ամբիոնը, որը արդեն լույս է բնծա-
յել նախատեսված 12 պրակից, հայոց պատմության տարբեր ժամանակաշրջաններ լուսարա-
նող 7 պրակ:

Հնագույն և հին շրջաններին նվիրված առաջին պրակը ուշագրավ մի աշխատություն է,
որը անկասկած կարևոր ներդրում է հայագիտության մեջ: Այն կազմված է երկու մեծ բաժին-
ների մեջ խմբավորված ինը գլուխներից, ժամանակագրական, գրականության, անձնանունների
և հատուկ անունների ցանկերից—ընդամենը 396 էջ:

Առաջին բաժինը «Նախնադարյան-համայնական և վաղ ստրկատիրական հասարակությունը
Հայաստանում» բաղկացած է չորս գլուխներից, որի առաջին գլուխն է «Նախնադարյան-համայ-
նական հասարակությունը Հայաստանում»: Որպես հիմք ընդունելով տվյալ ժամանակաշրջանի՝
ըստ աշխատանքային գործիքների և տնտեսության ձևերի առաջադրված պերիոդիկացիան, հեղի-
նակը շարադրում է նրա զարգացման հիմնական էտապները՝ հին և նոր քարե դարերը, բրոնզե
դարը և երկաթե դարի սկիզբը: Առաջին իսկ հայացքից նկատվում է, որ այստեղ
տեղ չի գտել պղնձե-քարային դարը (էնեոլիթը), սակայն մոտիկից ծանոթանալիս պարզվում է,
որ նրա մի քանի հատկանիշները բերված են նոր քարե դարի հատվածում (էջ 11—17): Այնինչ,
էնեոլիթը, հանդիսանալով Հայկական լեռնաշխարհի բնակիչների կյանքում մի կարևորագույն
էտապ, որը նշանավորվեց մետաղի՝ պղնձի՝ յուրացումով և հասարակության հաստատուն անցու-
մով հավաքչական-որսորդական տնտեսաձևերից երկրագործությանը և անասնապահությանը
պետք է առանձին քննության առնվեր:

Երկրորդ գլուխը նվիրված է Ուրարտական պետության պատմությանը և ներկայացված է
հետևյալ բաժիններով. Նաիրիի ցեղային միությունը, Ուրարտական պետության կազմավոր-
ումը, Ուրարտուն իբրև Առաջավոր Ասիայի հզոր պետություն, Պայքարի ուժեղացումը Ուրար-
տուի և Ասորեստանի միջև և Ուրարտական պետության թուլացումը, Ուրարտուի տնտեսությունը,
Հասարակական և պետական կարգը, Ուրարտական պետության անկումը, Ուրարտական կուլ-
տուրան:

Այս գլխի վերաբերյալ կարելի է աննշան դիտողություններով սահմանափակվել: Ուրար-
տական կերամիկայի հատվածում հեղինակը խոսում է կարմիր, ջնարակով և կարմրափայլ
զլազուրով զունավորված իրերի մասին (էջ 63): Ջնարակի, զլազուրի կիրառումը քնավ էլ
հատուկ չէ ուրարտական կավագործության համար: Ջնարակով պատած առարկաները հազվա-
դյուր են ուրարտական պեղված կենտրոններում, հանդիպածներն էլ ամենայն հավանականու-
թյամբ ներմուծված իրեր են: Իրենց պատրաստած արտադրանքը ուրարտական կավագործները
գերադասում էին զարդարել անզորապատման և փայլեցման միջոցով:

Հայ ժողովրդի կազմավորման հարցը շարադրված է պրակի երրորդ գլխում: Քննության
առարկա են դարձել այստեղ առասպելական ավանդությունները հայ ժողովրդի ծագման մա-
սին, հայ ժողովրդի ծագման հարցը պատմագրության մեջ, հայկական ցեղերն ու ցեղային միու-
թյունները, հայ ժողովրդի կազմավորման պրոցեսը:

Հեղինակը ելնում է այն ճիշտ դրույթից, որ հայերենը հնդեվրոպական լեզվախմբին է պատ-
կանում, հետևաբար և հայ ժողովրդի կազմավորման գործում առաջատար դեր են կատարել հնդե-
վրոպական ցեղերը: Նա սրանց հավասար դասում է Հայաստան երկրի բնակիչներին և արմեն-

ներին: Ըստ հայ ժողովրդի կազմավորման վերաբերյալ առաջադրված սխեմայի, հնդեվրոպացի հայասցիները միանում են նույն ցեղախմբին պատկանող արմեններին, միասին տարածվում Հայկական լեռնաշխարհում և յուրացնում նրա զգալի մասը: Ամենայն անվերապահությամբ առաջ քաշված այս տեսակետները բավարար չափով չեն հաստատված նույնիսկ մասնագիտական գրականության մեջ, քանի որ հայասցիների հնդեվրոպական բնույթը, դեռևս գիտական չլուծված վեճի առարկա է: Եթե վերջերս լույս տեսած ընդարձակ և ուշագրավ ուսումնասիրության մեջ փորձ է արված բացահայտելու հայաստական լեզվի հնդեվրոպական բնույթը¹, ապա մի շարք գիտնականներ փաստորեն ժխտել են այդ լեզվի առնչությունները հնդեվրոպական լեզվախմբի հետ: Սակայն, անկախ ամեն տեսակի եզրակացություններից, որին հանգում են լեզվաբանները հայաստական լեզվի վերաբերյալ, Հայաստան երկիրը պետք է անպայման հաշվի առնել հայ ժողովրդի կազմավորման հարցերը ուսումնասիրելիս: Հայկական լեռնաշխարհի հնագույն ցեղային միություններից է Հայաստան-Ազգին, որը ձուլվել է հայ ժողովրդի մեջ, որոշակի հետքեր թողնելով տեղանունների, պաշտամունքի և գուցե նույնիսկ ռեալ էթնիկական անվան մեջ:

Հայ ժողովրդի կազմավորման հարցերը քննության առնելիս հնարավոր չէ հանգամանորեն շանդրադառնալ խուրրիական ցեղերին, որոնք միայն հարևանցիորեն են հիշվում պրակի մեջ: Խուրրիների դերը հայկական լեռնաշխարհի հնագույն պատմության համար երկակի է. մի կողմից որպես հայկական լեռնաշխարհի որոշ հատվածներում առաջին պետական միավորի ստեղծողներ, մյուս կողմից՝ որպես կազմավորվող հայ ժողովրդի կարևորագույն բաղադրիչ մաս:

Ինչպես հայտնի է, դեռևս ն. մ. թ. 3-րդ հարյուրամյակից Առաջավոր Ասիայում հանդիպող խուրրիական ցեղերի շարքում տեղի է ունենում քաղաքական կոնսոլիդացիայի պրոցես, որը հանգում է ն. մ. թ. 17-րդ դարում խուրրի-միտանիական պետության կազմավորմանը: Այդ պետության հիմնական տերիտորիաները ընդգրկում էին Վերին Միջագետքը և հարավային Հայաստանը՝ Վանի ավազանը ներառյալ: Հնագույն այս պետության առկայությունը Հայկական լեռնաշխարհի թեկուզ և մի հատվածի վրա ինքնին մի ուշագրավ փաստ է ն. մ. թ. 2-րդ հազարամյակի պատմության համար, քանի որ այդ տերիտորիաներում ապրող ցեղերը ներգրավվեցին պետականության ոլորտը և այդ հանգամանքը թիչ նշանակություն չունեցավ իհարկե ավելի ուշ, 1-ին հազարամյակի սկզբներին, մոտավորապես նույն վայրում կազմավորվող Ուրարտական պետության ծագման համար:

Մեծ էր խուրրիական ցեղերի դերը նաև հայերի էթնոգենեզիսի համար: Փաստերը ցույց են տալիս, որ առկվազն ն. մ. թ. 2-րդ հազարամյակից սկսած խուրրիական ցեղերը բնակություն էին հաստատել Հայկական լեռնաշխարհի ընդարձակ տերիտորիայի վրա: Այդ հնագույն ժամանակներից մեզ հասած տեղանունների, ցեղանունների, անձնանունների և այլ կարգի նյութերի վերլուծությունը հաստատում է խուրրիների առկայությունը Հայկական լեռնաշխարհի ամենատարբեր վայրերում: Հյուսիսում խուրրիները հանդիպում են Կուլիսա, Գիտուխի, Զարախա, Սուխմի երկրներում, այսինքն Կարսի և էրզրումի ու նրանցից շատ հյուսիս ընկնող շրջաններում: Գոյություն ունի այն կարծիքը, որ նույնիսկ հյուսիս-արևմուտքում, Հայաստան-Ազգի երկրներում առկա է եղել այս տարրը: Խուրրիները ապրում էին նաև արևելքում, Արածանիի նեղքին հոսանքի շուրջը տեղադրվող Իշուվա երկրում: Հայկական լեռնաշխարհի հարավային մասը ևս բնակեցված էր խուրրիական ցեղերով, որոնց գտնում ենք հարավ-արևմուտքում Ալշե, Շուպրիա և Կաղմուխի երկրներում, Վանա լճի հարավային մասի՝ Խարուշկիա, Բարխի, Խարխի երկրներում²:

Հայնածավալ տերիտորիաներ զբաղեցնող խուրրիական բնակչությունը չէր կարող անհետեվանք չթափալ պատմության թատերարեմից, երբ Հայկական լեռնաշխարհում սկսվեց հայ ժողովրդի կազմավորումը: Ընդհակառակը, շատ հավանական է, որ տեղաբնիկ ցեղերի շարքում խուրրիները նշանակալից դեր են ունեցել այդ պրոցեսում: Ըստ Հերոդոտի դեռևս ն. մ. թ. 5-րդ դարում Հայկական լեռնաշխարհի տարբեր վայրերում հիշատակվում են մատիները, որոնք ամենայն հավանականությամբ նույն խուրրիներն էին³: Այդ դերի առանձին ասպեկտ-

¹ G. B. Y a h u k y a n, „The Hayaša language and its relation to the Indo-european languages“, Archiv Orientalni, Praha, 1961, 29/3, էջ 354—405.

² Г. К а п а н ц я н, Хайасса — колыбель армян, Ереван, 1948. Ի. Դիակոնով, Մեթոդը, հայերը և փոյուգիացիները, «Տեղեկագիր», Հայկ. ՍՍՏ ԳԱ, 1956, № 11: В. Быницыану, Некоторые вопросы этногенеза армян. «Պատմա-բանասիրական հանդես», Երևան, 1961, № 2, էջ 91—123.

³ Г. М е л и к и ш в и л и, Нанри—Урарту, Тбилиси, 1954, էջ 88—104, 108—117.

⁴ И. Д ъ я к о н о в, История Мидии, М.—Л., 1956, էջ 139—40, 226:

ները՝ լեզվական⁵, պաշտամունքային⁶, նյութական կուլտուրայի⁷, նոր են քայահայտվում, սակայն արդեն պարզ է, որ խորրիներին զանց առնելով չի կարելի հասկանալ հայ ժողովրդի պատմության հնագույն և հին շրջանների մի շարք կարևոր երևույթներ:

Չորրորդ գլուխը—«Հայկական հնագույն պետությունը» կազմված է հետևյալ ենթագլուխներից. Հայկական պետության առաջացումը և նրա պայքարը Մարաստանի դեմ, Հայաստանը Աքեմենյան Պարսկաստանի կազմում, Սոցիալ-տնտեսական հարաբերությունները 6—4-րդ դդ. (մ. թ. ա.):

Հայկական հնագույն պետության մասին խոսելիս, հեղինակը հիշատակում է ավանդական պատմության տվյալները՝ հայոց առաջին թագավոր Պարույր Սկայորդու մասին (էջ 133): Կարծում ենք, որ այս տվյալները ենթակա են վերանայման:

«Հայոց պատմության» 1-ին գրքի 19, 22, 23 և 24-րդ գլուխներում հորենացին տեղեկություններ է բերում Հայաստանում իշխող Սկայորդիների դինաստիայի մասին, ըստ հորենացու, դինաստիայի առաջին ներկայացուցիչն էր Սկայորդին, որի մոտ ապաստան են գտնում Ասորեստանի Սենեքերիմ թագավորի հայրասպան որդիները: Հաջորդ իշխանավորը Պարույրն է, Սկայորդու որդին, որը Ասորեստանը կործանելու ժամանակ մարերին օգնելու համար դառնում է հայոց առաջին թագավոր: Նրանից հետո իշխում է Հրաչեան, Բաբելոնի թագավոր Նարուսոդոնոսի ժամանակակիցը: հորենացին բավական լավ պատկերացում ունի այդ դինաստիայի ժամանակակից օտար թագավորների ապրած էպոխայի, նրանց հաջորդականության և ժամանակագրական փոխհարաբերության մասին: Օրինակ, նա ճիշտ է նշում, որ Սենեքերիմ (Սինախերիբ), Ասորեստանի թագավորը իշխել է Նարուսոդոնոսի Բաբելոնի թագավորից «80, քիչ ավել կամ պակաս տարի առաջ» (11, 23), քանի որ առաջինի թագավորության թվականները 704—681 են, իսկ երկրորդինը՝ 604—562:

Ապա հորենացին փաստորեն ակնարկում է Արմե-Շուպրիարի տեղադրության մասին, երբ խոսում է Հայկական լեռնաշխարհի հարավ-արևմտյան, Ասորեստանին սահմանակից, շրջանի մասին, որտեղ գտնվում է Սիմ (Սասուն) լեռը (11, 23): Պատմահայրը այս դինաստիան համարում է բնիկ և այդ կապակցությամբ չի թաքցնում իր ուրախությունը: Հիմք ընդունելով իշխանավորների անձնանունների ստուգաբանությունները, Սկայորդի—սկյութացու որդի, Պարույր—Պարտատուա, Պրոտոթիոս (սկյութական թագավորի անուն), մի շարք ուսումնասիրություններում առաջ է քաշվել Արմե-Շուպրիայում ն. մ. թ. 7-րդ դարում սկյութական դինաստիա իշխելու մասին տեսակետը⁸:

Արմե-Շուպրիայի պատմությունը լուսարանող ժամանակակից, ստույգ աղբյուրները, ասորեստանյան և ուրարտական սեպագիր արձանագրությունները, չեն հաստատում ավանդության տվյալները այդ դինաստիայի մասին: Ինչպես հայտնի է, Արմե-Շուպրիան տարրեր անունների տակ հիշատակվում է ն. մ. թ. 12-րդ դարից սկսած որպես մի երկիր, որը մշտական պայքար էր մղում անկախության համար անմիջական իր հարևանների՝ Ասորեստանի և Ուրարտուի դեմ: Նրա մի քանի իշխանավորների վերաբերյալ, ընդ որում նաև մեզ հետաքրքրող ժամանակաշրջանի մասին, պահպանվել են կարևոր տեղեկություններ: Այդպես օրինակ, ն. մ. թ. 9-րդ դարից մեզ հայտնի է Շուպրիայի Անխիտե թագավորի անունը⁹, նույն դարի վերջերին հիշատակվում է Բիսիրահին արիմացին¹⁰, Մենուա թագավորի (810—786) մի արձանագրությունից ծանոթ է Տիտիանին՝ Արմե-Շուպրիայի անմիջական հարևան երկրամասի իշխանավորը¹¹: 7-րդ դարի վերջերին են վերաբերում Շուպրիայի դեսպանների անունները՝ Իատտա և Արիյակկա¹², վերջապես Ասարիադոնի (ն. մ. թ. 680—664) նամակներում, որոնք լուսարանում են 7-րդ դարի

5 Գ. Ղ ա փ ա ն ց յ ա ն, Հայոց լեզվի պատմություն, Երևան, 1961, էջ 104—130:

6 Г. Меликишвили, *նշվ. աշխ.*, էջ 108—117:

7 А. Мартиросян, К предьстории древнейших этапов культуры Армении. «Պատմա-բանասիրական հանգես», 1960, № 1, էջ 108:

8 Գ. Ղ ա փ ա ն ց յ ա ն, Ուրարտուի պատմություն, Երևան, 1940, էջ 217—219: Բ. Պ ի ո տ ռ ո վ ս կ ի, Հայ ժողովրդի ծագման հարցի շուրջը, ՀՍՍՌ ԳԱ «Տեղեկագիր», 1945, № 6, էջ 20: Г. Капанцян, Хайасса — колыбель армян, Ереван, 1948, էջ 149—151, 246:

9 Ассиро-Вавилонские источники по истории Урарту, № 23 (II, 2), 28, 29, 31 (հետագայում АВИУ), Вестник Древней истории, 1951, № 2, 3, 4.

10 АВИУ, № 3.

11 Урартские клинообразные надписи, Москва, 1960, № 42.

12 АВИУ, № 50 (37).

80-ական թվականների ղեկավարը, հիշատակվում են Արմեն-Շուպրիայի թագավորի և նրա որդիների անունները: Ն(ի)կ-Քեշուր¹³, Շերպի-Ք(էշուր) և Լիզի-Քեշուր¹⁴; Թվարկած անունների վերլուծությունը ճիշտ է արտացոլում Արմեն-Շուպրիայի և անմիջական հարևան երկրների կթնի կական կազմը: Տիտիանի և Բիսիբաին անունները ուսումնասիրողների կարծիքով թրակա-փոյուղիական ծագում ունեն¹⁵: Մյուս մի քանի անունները տեղական, ըստ Երևույթին, խուրրիական ծագում ունեն: Միանգամայն խուրրիական կերպար ունեն մեզ հասկապես հետաքրքրող 7-րդ դարի անձնանունները: Ինչպես տեսնում ենք, բերված նյութը չի հաստատում ավանդական պատմաբանության տվյալները: Դեռ ավելին, 673 թ. ղեկավարի կապակցությամբ կազմված Ասարխաղոնի արձանագրությունները հանվան-հական հիշատակում են Արմեն-Շուպրիայի թագավորին: Այդ համարյա թե նույն ժամանակաշրջանն է, Լըր ըստ հորենացու նույն տեղում իշխում էր Սկայորդին: Այս տարածայնությունները ստիպում են ունալ բացատրություններ փնտրել հորենացու տեղեկությունների համար, առաջին հերթին սկյութանուն իշխանավորների մասին: Այդ տվյալների իմաստը հասկանալու և նրանց պատմական ատաղձը բացահայտելու համար անհրաժեշտ է ծանոթանալ կիմմերական և սկյութական ցեղերի պատմության հետ Առաջավոր Ասիայում: Փաստերը ցույց են տալիս, որ այդ երկու ցեղերը, որոնք հաճախ շփոթվում են աղբյուրներում, նշանակալից դեր են խաղացել հին արևելյան պետությունների կյանքում¹⁶: Այս վաղկատուն ցեղերը հանդես էին գալիս որպես վարձկան խմբեր, որոնք իրենց ծառայությունն էին առաջարկում այս կամ այն պետությանը: Կիմմերական ցեղերը հանդես են գալիս Առաջավոր Ասիայում ն. մ. թ. 8-րդ դարի երկրորդ կեսում: Նրանց հաջողվում է պարտության մատնել սկզբում Ուրարտուն, ապա Ասորեստանը: Ն. մ. թ. 7-րդ դարում նրանք էլ ավելի են ակտիվանում: Ուրարտացիների հետ միասին կործանում են փոյուղիական պետությունը, մի քանի հարձակումներ կատարում Ասորեստանի վրա: Նույն ուրարտացիների հետ անմիջականորեն սպառնում են Արմեն-Շուպրիային: Որպես վարձկան մի ջոկատ նրանք հիշատակվում են նաև բուն Ասորեստանում:

Էլ ավելի նշանակալից էր սկյութացիների դերը, որոնք հանդես են գալիս ն. մ. թ. 7-րդ դարի սկզբին: Նրանց մեջ հայտնի առաջին առաջնորդն էր Նշակայր, որը մոտավորապես ն. մ. թ. 673 թ. սպանվեց Ասորեստանի դեմ մղված պատերազմում: Որպես մաննացիների և մարերի զաշնակիցներ սկյութացիները մեծ անհանգստություն էին պատճառում Ասորեստանին:

Իշպակային հաջորդել էր Պարտատուան, Հերոդոտի Պրոտոտիոսը, որը իշխել է մոտավորապես 672 թ. մինչև 654 թ.: Պարտատուային ասորեստանյան արձանագրությունները ճանաչում են որպես Աշկուզա երկրի, այսինքն՝ սկյութացիների թագավոր: Ասորեստանցիներին հաջողվում է իրենց կողմը թեքել սկյութական թագավորությունը և Պարտատուան նույնիսկ խնամիական կապերի մեջ էլ մտնում Ասորեստանի թագավոր Ասարխաղոնի հետ: Մոտավորապես 654 թ. Պարտատուային հաջորդում է որդին՝ Մադիասը, որը Ասորեստանի զորմամբ սկզբում պարտության էլ մատնում կիմմերացիներին Փոքր Ասիայում, հետո հաստատում սկյութացիների գերիշխանությունը Մարաստանում (ն. մ. թ. 652 թ.): Այս կապակցությամբ աճում է սկյութացիների դերը Առաջավոր Ասիայում. բայց ոչ երկար ժամանակով: Մարերի թագավոր Կիաքսարին հաջողվում է մոտավորապես ն. մ. թ. 625 թ. թոթափել նրանց լուծը: Սկյութական թագավորությունը ընկնում է Մարաստանի ազդեցության տակ, իսկ ն. մ. թ. 590-ական թվականներին՝ իսպառ լիկվիդացվում: Շատ հավանական է, որ հորենացու տվյալները ն. մ. թ. 7-րդ դ. Հայաստանում սկյութական դինաստիայի գոյության մասին, Առաջավոր Ասիայում կիմմերացիների և սկյութացիների պատմության հետ առնչվող հանգամանքների և իրադարձությունների կնիքն են կրում¹⁷: Դեռ ավելին, թվում է, որ Հայկական պատմական ավանդությունը այս դեպ-

13 АВИУ, № 70.

14 АВИУ, № 67.

15 Г. Мелликишвили, Наирн—Урарту, էջ 245, ծանոթ. 1: В. Быницыну, նշված աշխ., էջ 111, ծանոթ. 1:

16 И. Дьяконов, История Минди, էջ 228—254 և Б. Пиотровский, Ванское царство, Москва, 1959, էջ 232—256.

17 Այդպես պետք է բացատրել նաև Կորյունի վկայությունը հայերի Աղբանդեան, այսինքն սկյութական ազգ լինելու մասին («Վարք Մաշտոցի», Երևան, 1941, Ա, էջ 22): Հնարավոր է նաև, որ այս բնորոշումը ավելի ուշ թարգմանիչներին պատկանող մի մեկնաբանում է, որը կունում է աստվածաշնչից և չի հանդիսանում մի ինքնուրույն, անկախ տրադիցիա: (Տե՛ս Մ. Արեղյանի ծանոթագրությունները, էջ 103):

քերի ազդեցության ներքո փոխ է առել սկյութական Պարտատուա թագավորի անունը և այն ներկայացրել որպես Հայերի Պարույր թագավոր:

Ինչպես տեսանք, սկյութացիների Պարտատուան Պրոտոտիոս թագավորը իշխել էր ն. մ. թ. 673—654 թվին, այսինքն ն. մ. թ. 7-րդ դարի առաջին կեսում: Հայոց Պարույրը հիշատակվում է 612 թ. դեպքերի կապակցությամբ, այսինքն պետք է ենթադրել, որ նա իշխել է 7-րդ դարի վերջերին: Երկու անվանակիցների առկայությունը 7-րդ դարում, մեկը՝ սկյութացիների մոտ. մյուսը՝ հայերի բավական անհավատալի է թվում, եթե ի նկատի ունենանք ևս երկու հատկանշական զուգադիպումներ: Նորապույն ուսումնասիրողներն արդեն ցույց են տալիս, որ հակառակ հորենացու պնդումներին, Պարույրի ընկ թագավոր լինելու մասին¹⁸, վերջինս, ինչպես երևում է նույն հորենացու տվյալներից, սկյութական ցեղից էր: Մյուս կողմից՝ հորենացու տեղեկությունը Պարույրի մասին, որպես հայերի առաջին թագավորի, շատ լավ է համընկնում սկյութացիների Պարտատուայի հետ կապված հանդամանքների հետ և փաստորեն նույնպես փոխառություն է: Հայտնի է, որ ասուրական սեպագիր արձանագրություններում, ի տարբերություն իր անմիջական նախորդ Իշպակայի, որը հիշատակվում է լուկ որպես սկյութացիների առաջնորդ, Պարտատուան ամենայն որոշակիությամբ հատկապես է հորջորջվում իրեն թագավոր¹⁹: Հետևաբար սա սկյութացիների առաջին թագավորն էր, մի հանդամանք, որը ևս իր արտացոլումն է գտել հորենացու Հայոց Պարույրի հատվածում:

Պարտատուայի յուրացումը ավանդության կողմից բացատրվում է նաև այն մեծ դերով, որ նա խաղացել է Ասորեստանի և Առաջավոր Ասիայի կյանքում, որի մասին ակնարկներ կան և Հերոդոտի մոտ:

Սկյութական դինաստիայի մասին տեղեկությունների նմանօրինակ մեկնարանումը չի բացասում, այլ, ընդհակառակը, վկայում է հայերի որոշակի ազդեցության մասին կիմմերացիների և սկյութացիների հետ:

Հայտնի է, որ սկյութական թագավորությունը Հայկական լեռնաշխարհին անմիջականորեն հարևան էր և գտնվում էր կամ Մաննայում, այսինքն Ուրմիա լճի հարավում²⁰, կամ Քոտ 1 Արաքս գետերի ստորին հոսանքների միջև ընկած տերիտորիայում²¹: Ասորեստանի հետ պատերազմելիս սկյութացիները հիշատակվում են Մարաստանի ասուրական մարզերում, Մաննայում, այսինքն նույն Ուրմիո շրջանում, բայց նաև հուրուշիյա կոչված շրջանում, Վանա լճի հարավում²²: Որչառ է, հիշատակված վայրերը, բացառությամբ վերջինիս, բավական հեռու էին Հայ-արմենների բաղաձայն կենտրոն Արմե-Շուպրիայից, բայց Ստրարոնի մի վկայությունը հայերի տարածման մասին Շուպրիայից մինչև Ադիարեն և Կալաթեն (XI, 4, 9 և XI, 14, 12), այսինքն արևմտյան Տիգրիսի սկզբներից Արևելյան Տիգրիսի վրայով մինչև Ուրմիայի՝ արևմտյան Տիգրիսի, մեծ Զարի և Խարուրի միջև ընկած շրջանները, որոշակի առնչություն կարող է ունենալ սկյութացիների զեղերումների հետ, եթե ճշտվի Ստրարոնի վկայության ժամանակագրական կողմը: Վերոհիշյալ վկայությունները սկյութացիների մասին ընկալվում են ամենայն որոշակիությամբ ն. մ. թ. 675—673 թթ.: Հայ-արմենների էքսպանսիան դեպի Ուրմիա, որի մասին խոսում է Ստրարոնը և որը ամեն զեպքում գոտ էթնիկական էր և ոչ թե քաղաքական, սկսվում է. ըստ երևույթին, ն. մ. թ. 7-րդ դարից, բայց հավանաբար նրա երկրորդ կեսից: Բայց այս զեպքում սկյութացիների և հայերի շփման կետերը էլ ավելի են աճում: 652 թ. սկյութացիները նվաճում են Մարաստանը և զերիշխող դիրք ձեռք բերում Առաջավոր Ասիայում: Նրանց թագավորությունը մի բազա է գտնում Ուրարտուի, Ասորեստանի ծայրամասային երկրների վրա հարձակումներ անում էին հին արևելյան պետությունների տերիտորիաները և հասնում Փոքր Ասիա, Սիրիա, Պաղեստին և անգամ Սեպտոս: Այս պայմաններում հնարավոր է, որ Ուրմիո արևմտյան շրջանի հայկական էթնիկական տարրը, եթե նա այդ ժամանակ իսկապես ներթափանցել էր այնտեղ, ընկներ սկյութացիների ժամանակավոր զերիշխանության ներքո: Բացառված չէ նաև, որ բուն

¹⁸ Մեր միջնագրայն հեղինակները էլ ավելի որոշակիությամբ են խոսում այս մասին: Տե՛ս Հ ո Վ հ ա ն ն ե ս Գ Ր ա ս ի ա ն ա կ ե ռ տ յ ի, Պատմություն հայոց, Մոսկվա, 1853, էջ 14 և Ո ա մ ու ե ի Ա ն ե յ ի, Հալաբումը ի գրոց պատմագրաց, Վաղարշապատ, 1893, էջ 45:

¹⁹ АБИУ, № 68 г, 19 և И. Дьяконов, Եղվ. աշխ., էջ 246, 272:

²⁰ R. Ghirshman, „Le trésor de Sakkez Artibus Astae“, XIII, 3, 1950, էջ 201:

²¹ И. Дьяконов, Եղվ. աշխ., էջ 248 և հաջորդ:

²² АБИУ, № 65, 68 в, 68 г, 2, 68 г, 15, 18

կենտրոնը, Արմեն-Շուպրիան ևս ենթարկված լինելու հարձակումների սկյութացիների կողմից, չնայած, դատելով սկզբնաղբյուրներից, նա 7-րդ դարի երկրորդ կեսում արդեն անկախ մի երկիր էր: Այս ընդհարումների մասին է վկայում Սեբեոսը, երբ ասում է, որ հայերը կոտորեցին «զհսկայան (այսինքն սկյութացիներին) որ զարածողով եղեն... ի միջագետս Ասորոց»²³:

Խորենացու մոտ բերված տվյալներից, պատմական կոնկրետ իրադարձությունների արձագանք կարող են լինել Նինիվեի և Ասորեստանի կործանմանը հայերի մասնակցելու մասին և այդ օրերին ստեղծված հայ-մարական դաշինքի մասին տեղեկությունները:

Հայտնի է, որ Քսենոֆոնի, ճիշտ է ոչ շատ արժանահավատ աղբյուրի համբավ ունեցող, «Կյուրոպեդիայում» հայերը հիշատակված են ի թիվս Մարաստանի դաշնակիցների, երբ վերջինս զբաղված էր Ասորեստանի նվաճումով: Կարևոր նշանակություն ունի նաև Ասորեստանի վերջին տարիները նկարագրող Բաբելոնի թագավոր Նաբուպալասարի այսպես կոչված «Գէղդի տարեգրություն» տվյալները: Ասորեստանի կործանմանը մասնակից Մարաստանի թագավոր Կիաքսարը մերթ հանդես է գալիս որպես մարերի թագավոր. մերթ որպես՝ Ումման-Մանգալի: Վերջին տերմինը վեճի առարկա է, բայց բացառված չէ, որ նա ունի ավելի լայն իմաստ և ենթադրում է մարերից բացի նաև այլ դաշնակից կամ ենթակա ցեղեր ու ժողովուրդներ²⁴: Այս դեպքում հնարավոր է կարծել, որ հայերը ևս ի նկատի են առնված այս տերմինի տակ, որպես հիշյալ դեպքերի մասնակիցներ: Պատմական իրադրության վերլուծությունը ևս կարող է հաստատել Խորենացու այս տվյալների ճշտությունը: Այսօր ընդունված մի տեսակետ է, որ ն. մ. թ. 7-րդ դարի երկրորդ կեսում Արմեն-Շուպրիան քաղաքական անկախություն էր ձեռք բերել: Սրբնույն դարի վերջին սկսվեց Մարաստանի և Բաբելոնի գրոհը Ասորեստանի դեմ, Արմեն-Շուպրիան որպես վերջինիս ծայրամասային մի երկիր, որը դարեր շարունակ հարձակումների և կեղեքման էր ենթարկվել, պետք է որ միացած լիներ հակաասորական ընդհանուր ճակատին: Դժվար է ասել արդյոք հայ-արմենական ջոկատները, կոնկրետ մասնակցություն ունեցել են Նինիվեի գրավմանը, թե ոչ: Ավելի հավանական է, որ Արմեն-Շուպրիայի միջամտությունը տեղի ունեցած լինի պատերազմի երկրորդ փուլում, երբ ռազմական գործողությունները Նինիվեի և Աշշուրի նվաճումից հետո տեղափոխվեցին Ասորեստանի բուն տերիտորիաներից դեպի հյուսիսային և հյուսիս-արևմտյան Միջագետք: Ն. մ. թ. 610—609 թվականներից սկսած այստեղ, Խարրան քաղաքի շուրջը, դաշնակից մարերի ու բաբելացիների և ասորեստանցիների միջև տեղի ունեցան երկարատև մարտեր, որոնք շարունակվեցին նույնիսկ ավելի հյուսիսում գտնվող Իծծալայի լեռներում: Հիշյալ վայրը արդեն անմիջականորեն մոտ է Արմեն-Շուպրիային և մասամբ այդ պատճառով ենթադրում ենք, որ հայերը մասնակից դարձան այդ պատերազմին: Սակայն կարելի է բերել և այլ փաստեր:

Ուրարտուի կործանումը և հայկական թագավորության հաստատումը տեղի է ունեցել մարերի և հայերի միացյալ ուժերով: Այդ դաշնակցությունը, ամենայն հավանականությամբ, ոչ թե հանկարծակի է ձևավորվել, այլ հանդես է եկել Ուրարտական պետության հպատակեցումից առաջ, դեռևս Ասորեստանի դեմ պայքարի ընթացքում: Այդ երևում է նաև Ասորեստանի դեմ մղած մարտերի ժամանակ մարերի 609 թ. դեպի Ուրարտու կատարած արշավանքից, Հյուսիսային Միջագետքից, Արմեն-Շուպրիայի հարավից ձեռնարկվող այս արշավանքը պետք է անցած լիներ Արմեն-Շուպրիայի տերիտորիայով և կատարված լիներ նրա մասնակցությամբ: Մարաստանի և Արմեն-Շուպրիայի հակասորեստանյան դաշինքը դարձավ նաև հակասորատական:

Ձեռնարկի երկրորդ բաժինը՝ «Ստրկատիրությունը Հայաստանում», սկսվում է «Հայկական մանր թագավորությունները 4—3-րդ դարերում (մ. թ. ա.)» գլխով: Այստեղ տեղ են գտել երկու հարցեր. Հելլենիզմի դարաշրջանը Արևելքում և Հայկական թագավորությունները 4—3-րդ դդ.:

Առարկության է ենթակա գլխի վերնադիրը, որի մեջ «մանր» բնորոշումը ավելորդ է թվում, քանի որ իսկապես ոչ մեծ տերիտորիաների վրա ստեղծվող հայկական պետական կազմավորումների կողքին, քննության առնված ժամանակաշրջանի հենց սկզբին, հիմնադրվում է Երվանդունիների միացյալ պետությունը, որը իր կազմի մեջ էր ընդգրկում Հայկական լեռնաշխարհի զգալի տարածությունները: Հայտնի է, որ այդ թագավորությունը ժառանգել էր Արմենիա պարսկական սատրապության, որը հույն պատմիչ Քսենոֆոնի վկայությամբ օրնդարձակ մի երկիր էր (Անաբազիս, III 5, 17):

²³ Սեբեոս, Պատմություն, Երևան, 1939, էջ 10. Տես նաև Կ. Ղափանցյան, Ուրարտուի պատմություն, էջ 218:

²⁴ И. Дьяконов, Визв. азв., էջ 307, ծան. 1, Б. Пиотровский, Визв. азв., էջ 236, ծան. 21:

ի դեպ, հեղինակը, թվարկելով Ն. մ. .թ 4-րդ դարի Երվանդունիների պետության բազմաթիվ նահանգները (էջ 175), փաստորեն հերքում է վերնագրի ոչ ճիշտ ձևակերպումը:

Հայկական լեռնաշխարհում Սելևկյան գերիշխանության հաստատման հանգամանքները Ն. մ. թ. 3-րդ դարի վերջին, մեր կարծիքով, ճիշտ չեն պատկերված: Ըստ ձեռնարկի, ստացվում է, որ դեռևս Երվանդունիների պետության վերացումից առաջ և նրան զուգահեռ Հայկական լեռնաշխարհում, Արտաշեսի գլխավորությամբ, հիմնադրվել էր սելևկյան ստրատեգիա: (Տես էջ 185, 187): Երվանդունիների պետության վերջին տարիների պատմությունը լուսարանող աղբյուրները նման հետևությունների համար հիմքեր չեն տալիս: Ընդհակառակը, ինչպես երևում է Ստրաբոնի և Մովսես Խորենացու համապատասխան վկայություններից²⁵, միայն Երվանդ 4-րդի և նրա պետության վերացումից հետո է, որ Արտաշեսը որպես ստրատեգոս, իշխանության գլուխ անցավ:

Հաջորդ վեցերորդ գլխում—«Հայկական կենտրոնացված ստրկատիրական պետությունը»—քննության են առնված հետևյալ հարցերը. Հայկական հողերի միավորումը և միասնական կենտրոնացված պետության առաջացումը, Հայաստանը որպես Առաջավոր Ասիայի հզոր պետություն, Հայ-հռոմեական պատերազմները, Հայաստանի պայքարը իր ինքնուրույնության և հզորության վերականգնման համար:

Հեղինակը բերում է ակադ. Մանանգյանի կարծիքն այն մասին, որ Արմավիրի արձանագրությունների երկրորդ խումբը դամբանագիր է, և տեղագրված է եղել Երվանդի մահարձանի մոտ (էջ 189):

Մովսես Խորենացու՝ Երվանդի վախճանը պատկերող հատվածում ոչ մի ակնարկ չկա վերջինիս Արմավիրում թաղված լինելու մասին: Արձանագրությունների տեղանքի ուսումնասիրությունից ևս չի կարելի նմանօրինակ հետևություններ անել: Վերջապես արձանագրությունների բովանդակությունն էլ ամբողջությամբ վերցրած չի հաստատում բերված կարծիքը²⁶:

Ճիշտ չէ նաև այն, որ այդ արձանագրություններից առաջին երկուսը ամբողջ տարվա համար առողջության մաղթանքներ պարունակող մի տեքստ են (նույն տեղում):

Եթե առաջինը իսկապես ողջույնի մի նամակ է, որպիսին բազմաթիվ անգամ է հանդիպում հելլենիստական աշխարհում, երկրորդի մեջ, ամենայն հավանականությամբ, ֆիբսացիայի է ենթարկվում սելևկյան տոմարի պաշտոնական մուտքը Հին Հայաստան²⁷: Այս արձանագրության վերջում, ըստ երևույթին, ինքնուրույն նշանակություն ունեցող մի հատված կա, քառառոտիցության մաղթանքներով՝ ուղղված ոմն Փառնակին:

Արտաշես, Դադարչիչ և Արտուխաս անունների նախնական ձևերի ստուգարանությունները հայտնի են և նրանք չեն համընկնում իրար հետ: Այս պատճառով, այդ անունների հաճախակի նույնացումները (էջ 144, 155, 192) իրենց չեն արդարացնում և ամեն դեպքում ավելորդ են այս տիպի աշխատության մեջ:

Փարաթարում գտնված քարե բեկորի վրա, հակառակ ձեռնարկի տվյալների (էջ 192), ոչ Արտաշեսի և ոչ էլ Զարեհի արամեատառ անուններն կան, այլ միայն մի տառ, որի ընթերցումը բավական կասկածելի է:

Զարիշատ և Զարեհական քաղաքների հիմնադրումը հեղինակը վերագրում է Արտաշեսի հորը՝ Զարեհին, կամ այդ նույն անունը կրող որդուն (էջ 195): Սակայն ինչպես հայտնի է, Արտաշեսի հայրը թագավոր չի եղել: Սևանի արամեատառ արձանագրություններում օրինակ, Զարեհը, ի տարբերություն իր որդու՝ Արտաշեսի, անտիտղոս է: Մյուս կողմից, Արտաշեսի՝ Զարեհ անունը կրող որդու գոյությունը պատմականորեն չի հաստատվում: Այդ պատճառով ավելի հավանական է, որ վերոհիշյալ երկու, ինչպես նաև երեք նույնանուն քաղաքները ևս հիմնադրվել են Արտաշես 1-ի օրոք, նրա հոր անունով²⁸:

Մի ամբողջական գլուխ, յոթերորդը, նվիրված է Հայաստանի տնտեսությանը, հասարակական և պետական կարգին: Այստեղ շարադրված են հետևյալ հարցերը. Տնտեսության հիմ-

25 «Աշխարհագրություն», XI, 14, 5, 15, «Հայոց պատմություն» II, 37—47:

26 К. В. Тревер, Очерки по истории и культуре древней Армении, М.—Л., 1953, էջ 143—145.

27 Ս. Տեր-Հակոբյան, Արմավիրի նորագյուտ արձանագրությունը, Նյութեր Հին Հայաստանի պատմության, Երևան, 1935, էջ 148:

28 Г. Саркисян, Тигранакерт, Москва, 1960, էջ 43.

նական ճյուղերը և Հասարակական և պետական կարգը: Հեղինակը հանգամանորեն է ներկայացրել սովետական պատմագիտության տեսակետները հին Հայաստանում ստրկատիրական կարգեր գոյություն ունենալու մասին: Սակայն այդ հասարակարգի ամբողջական պատկերը ստեղծելու նպատակով, ինչպես նաև մեջ բերած տեսակետները էլ ավելի ամրապնդելու համար, անհրաժեշտ էր դիմել մի շարք նորագույն աշխատությունների²⁹, որոնք իրենց արտահայտությունը չեն գտել տեքստում և բացակայում են գրականության ցանկից: Դրանց մեջ, հայկական աղբյուրների (Մովսես Խորենացի, Աղաթանգեղոս, Զենոբ Գլակ), ինչպես նաև հույն աշխարհագիր Ստրաբոնի հաղորդած հակիրճ, բայց կարևոր տեղեկությունները Հին Հայաստանի սոցիալ-տնտեսական կյանքի կարևորագույն հատվածի՝ հողային հարաբերությունների մասին, ուսումնասիրված են հելլենիստական Փոքր և Առաջավոր Ասիայի նյութերի ֆոնի վրա, և համեմատաբար ավելի հարուստ տվյալների օգնությամբ բացահայտված է հին Հայաստանի հողատիրության ձևերի մի քանի հանգուցային հարցերի կուրսները:

Հին Հայաստանում հողի մասնավոր սեփականությունը զարգանալու մասին խոսելիս, այնքան էլ հարմար չէ վկայակոչել Արմավիրի առաջին երկու արձանագրությունների տվյալները (էջ 264), քանի որ նրանք ավելի շուտ շափածո հատվածներ են, որոնք ունեն բարոյագիտական ընդգծված բնույթ, հավանաբար կիրառություն են գտել Արմավիրի հանրաժանով պատգամախոսարանում³⁰:

Այսպես զույգը վերնագրված է «Արշակունյաց թագավորությունը Հայաստանում 1—3-րդ դարերում» և բաղկացած է երկու ենթադրություններից՝ «Հայկական պետականության վերականգնումը» և «Հայաստանը 2—3-րդ դարերում»:

Հեղինակը արտահայտում է այն միտքը, որ Տրդատ 1-ի ժամանակներից սկսած (մ. թ. 66—100), Գառնին դառնում է հայ Արշակունի թագավորների ամառային նստավայր (էջ 303)՝ Սակայն փաստերը ցույց են տալիս, որ մի կողմից Գառնիի անառիկ հռչակված ամրոցը ծառայել է թագավորներին որպես ապաստան, իսկ մյուս կողմից, իրեն այդպիսին, նա գոյություն է ունեցել Տրդատ 1-ից դեռ շատ ավելի վաղ: Այդ մասին են խոսում հնագիտական կարգի նյութերը, ինչպիսիք են՝ Տրդատից առաջ գոյություն ունեցող պարսպապատի մնացորդները, ն. մ. թ. առաջին դարերին վերաբերվող խեցեղենի, Անտիոքոս 4-րդ նպիֆանեսի արծաթյա դրամի առկայությունը ամրոցի տերիտորիայում:

Կարևոր ցուցմունք կա այս մասին նաև հոռոմեացի պատմագիր Տակիտոսի մոտ, որը հիշատակում է կանգուն, զործող ամրոցը Տրդատի զահակությունից առաջ ն. մ. թ. 51 թ.:

Որոշակիորեն ասել, թե ե՞րբ է կառուցվել Գառնիի ամրոցը, դժվար է, բայց ավելի հավանական է թվում, որ Արտաշեսյանների օրոք է նա հիմնադրվել: Գառնիի աշխարհագրական դիրքը Արտաշատի նկատմամբ (ոչ շատ հեռու, բայց խորը նախալեռնային շրջանում թաքնված), ամրոցի կատարած դերը մայրաքաղաքի կյանքում (ապաստան), նրանց երկուսի ընդհանուր նակատագիրը, հնարավոր են դարձնում այսպիսի կարծիքը:

Ձեռնարկը եզրափակվում է «Հայկական հնագույն կուլտուրան» գլխով, որտեղ իրենց արտացոլում են գտել հետևյալ հարցերը. Գրականություն, ժողովրդական վեպ և թատրոն, Պաշտամունք և տոմար, Հայկական հելլենիստական արվեստը:

Այստեղ բերված մի շարք ուսումնասիրողների կարծիքն այն մասին, որ Արմավիրի արձանագրությունների շափածո տեքստերը վերցված են Արտավազդ 2-րդի ողբերգություններից, չեն համապատասխանում իրականությանը: Արձանագրությունների թվագրումը ակադ. Մանանդյանի կողմից, ինչպես նաև նոր տվյալները կասկած չեն թողնում, որ նրանք դրոշմված են եղել Արտավազդից դեռ շատ առաջ, ն. մ. թ. 3-րդ դարի վերջերին:

Հայ ժողովրդի պատմության առաջին պրակի բովանդակության հետ թուրքիկ ծանոթությունն անգամ ցույց է տալիս, որ շնայած քննության առկա ժամանակաշրջանի ընդարձակությանը (Հայկական լեռնաշխարհում մարդկային հասարակության զարգացման սկզբից, հին քարե դարի վաղագույն փուլերից մինչև մեր թ. 4-րդ դարի սկիզբը, ֆեոդալական հասարակու-

²⁹ А. Г. Периханян, Древнеармянские востаники, В. Д. И., 1956, № 2, նույնի, Иеродулы и вероі храмовых объединении Малой Азии и Армении, В. Д. И., 1957, № 2, նույնի, Храмовые объединения Малой Азии и Армении, Москва, 1959.

³⁰ К. В. Тревер, նշվ. աշխ., էջ 110, 122, 125:

³¹ Б. Аракелян, Гарни, I, էջ 27 և Гарни, II, էջ 83:

թյան ձևավորումը) և այդ հանդամանքից բխող ընդգրկված նյութի բազմակողմանիությանը և դժվարամատչելիությանը, այն հանդիսանում է միանդամայն հաջողված գործերից մեկը:

Նման տիպի աշխատությունը պետք է հետապնդի երկու նպատակ. ա) հիմնված լինի դիտական, ստուգված նյութի վրա, բ) շարադրանքը մատչելի դարձնի ընթերցողին:

Անցած մի քանի տասնամյակներում Հին Հայաստանի պատմության մի քանի հանդուցային հարցերի մշակման գործում սովետական հայագիտությունը հասել է զգալի հաջողությունների: Այդ հավասարապես վերաբերում է նախնադարյան-համայնական հնագիտության և նրանից բխող հասարակության դարդացման օրինաչափությունների բացահայտման աշխատանքներին, Ուրարտական պատմության պատմության ու կուլտուրայի, հայ ժողովրդի ծագման ու կազմավորման, Հին Հայաստանի սոցիալ-տնտեսական կառուցվածքի, Երվանդունիների, Արտաշեսյանների, Արշակունիների քաղաքական պատմության և այլ խնդիրների լուծմանը:

Թվարկված հարցերը քննության են առնվել մեր պատմագիտության մեջ ինչպես առանձին մենագրություններում, այնպես էլ բազմաթիվ հոդվածներում և ստվար քանակով իրենց արտացոլում են զտել պրակում: Սակայն, որպես կանոն, հեղինակը չի բավարարվում մեխանիկորեն կատարված վերաշարադրանքով, այլ փորձում է իմաստավորել, համեմատել, ի մի բերել ու ամփոփել տվյալ հարցի մասին գոյություն ունեցող տեսակետները: Դեռ ավելին, առաջ քաշված մի շարք հետաքրքիր և կարևոր հարցեր առաջին անգամ իրենց լուծում են գտնում այստեղ:

Ինչպես անհրաժեշտ է այս տիպի աշխատանքի, ձեռնարկի համար, շարադրանքը ընդունել է բավական համաչափ բնույթ, թեպետ հեղինակը աշխատել է հավասար շափով լուսաբանել հասարակական կյանքի որքան հնարավոր է շատ ասպարեզներ՝ քաղաքական, սոցիալ-տնտեսական, նյութական կուլտուրայի գաղափարախոսություն:

Ղեկավարվելով մարքսիստական պատմագիտության սկզբունքներով, հեղինակը ճիշտ է ըմբռնել քննության առնված ժամանակաշրջանի պատմության զարգացման պրոցեսը: Այդ տեսակետից նա հատուկ ուշադրություն է դարձրել սոցիալ-տնտեսական հարցերին՝ պատմության բոլոր էտապներում—նախնադարյան-համայնական, ուրարտական, հելլենիստական: Հատկապես մեծ ուշադրություն է դարձված վերջինիս ֆորմացիայի հարցին, որը երկար ժամանակ վեճի առարկա հանդիսանալով, այժմ դնալով ավելի որոշակի լուծում է ստանում Ս. Տ. Երեմյանի, Գ. Ն. Սարգսյանի և Ա. Գ. Փերիխանյանի աշխատություններում:

Դրված լինելով դիտական հիմքերի վրա, պրակը զուրկ չէ հաջող ձեռնարկի մի շարք առավելություններից: Պատմական պրոցեսը, նրա օրինաչափությունների ընթացքը, դեպքերի և իրադարձությունների փոխադարձ կապը, հեղինակը աշխատել է հստակորեն բացահայտել և պարզաբանել: Այդ գործում նրան նպաստել է դյուրամատչելի ոճը, խոսքի պարզությունը, անհրաժեշտ դեպքերում դիպուկ ձևակերպումների օգնությամբ խտացած մտքերի արտահայտելու ունակությունը, շարադրանքի տրամաբանական և կուռ կառուցվածքը, հանդամանքներ, որոնք աշխատության դրույթներն ու մտքերը դարձնում են ընդունելի և համոզեցուցիչ մեր հասարակայնության ամենալայն խավերի համար: Դրա լավագույն ապացույց՝ ամբողջ տպաքանակի արագ սպառումն է: Կասկած չի կարող լինել, որ պրակի հրկրորդ հրատարակությունը, որի պակասն արդեն զգալի է, կհանդիպի նույն բարյացակամ ընդունելությանը:

Գ. Ա. ՏԻՐԱՅՅԱՆ